

[0]演唱會

「阿哥……幫下手啦……」

「唔得呀，你搵其他人幫手啦。」阿妹入咗嚟我間房，求我幫手買演唱會飛。

「阿哥啊～唔係噉都托我手脰下話？」佢大半年前開始迷上 Twelve 呢隊男歌手組合（香港依家最紅嗰隊），然後日日嚟我面前講嗰十二個人唱歌有幾好聽，跳舞有幾好睇，同埋有幾靚仔。

「都話我聽朝約咗人咯。」阿妹想我聽朝十點開齊晒電腦、手機，幫佢上網搶 Twelve 嘅演唱會飛。其實我明佢諗咩嘅，話晒 Twelve 真係好紅：佢哋前排開咗個小型演唱會，啲黃牛飛都炒到成四五千蚊一張；今次佢哋去到紅館連開四日演唱會㗎，聽朝賣飛一定全香港爭崩頭。

[2]

「你都係約班 friend 去動漫節睇日本妹咋嘛！」

「都話人哋係叫『東京 46』，係當今日本最紅嘅女子組合——」今年動漫節竟然請到佢哋十個成員嚟表演，我等咗佢哋嚟香港好耐喇！

「我二十歲，班女仔仲細過我！」

「喂靚妹，我廿七歲添啦，我幾時噏過你隊 Twelve 做『靚仔』啊？」

「嘩！你捧你隊 46，咪同我捧我隊 Twelve 一樣！」

「至少我冇日日對住你讚佢哋有幾靚女囉！」

「但係你日日沖涼都唱佢哋啲歌呢，勁難聽囉！」

「哎呀，畀返啲面嚟好㗎！話晒都係你大佬……」

「吓？我先唔得閒睺你囉！」

「唔得閒就出返去喇，唔好企喺度——」

[3]

「一係你借錢畀我買黃牛嘞！」

「你聽咗線呀？黃牛閒閒哋都炒到五千蚊啊！你幫人補習賺好多錢咩？」

「所以咪問你借囉！」

「你都傻嘅！我做侍應咋，你估我人工好高呀？」

「噉你又買部咁貴嘅電腦？」阿妹一手指住我部新電腦。

「喂，我自己錢買有咩問題？」

「冇～但係你用咗我個學生優惠呢——」

[4]

阿妹隨即又一手指住我牆上嘅東京 46 海報：「仲有呢啲海報，唔知之前係邊個問我點樣喺日本網站訂貨嘅呢啱？」阿妹讀書叻過我好多，仲要喺大學主修緊日文，我每次有日文睇唔明都係搵佢求救……

[5]

「我記得，係我咁嘛，得未？」

「得～噉即係聽朝你幫唔幫手啫～？」阿妹嘅語氣真係話變就變。

「得喇得喇，十點咁嘛？我同班 friend 講我遲到。」明明我內心仲想駁佢，有我幫手都唔一定搶到飛——

「好嘢～幾時都話我大佬係全世界最好嘅大佬！」但係對住呢個牙尖嘴利嘅阿妹，我真係冇晒乎……

00197:《演唱會》The Concert

The CC BY 4.0 license REQUIRES that any content that is reused or repurposed must have the correct ATTRIBUTION. Please use the text below in your citations, printouts and copyright pages.

Attribution Text

"The Concert" (Cantonese), written by Yip Chun Yin, illustrated by Kenneth, published by HamBaangLaang (© HamBaangLaang, 2022) under a [CC BY 4.0](#) license on hambaanglaang.hk

[Find out more here: [HamBaangLaang Attribution terms and CC 4.0](#)]
